

## Nyumba Ambayo Mungu Anaweza Kuibariki

*Kwa maana nimemjua ya kwamba atawaamuru wanawe na nyumba yake baada yake waishike njia ya Bwana, wafanye haki na hukumu. Mwanzo 18:19.*

**K**atika macho ya Mungu, mtu ni kile tu alivyo katika familia yake. Maisha ya Ibrahimu, rafiki wa Mungu, yalidhihirishwa na heshima kamili kwa neno la Bwana. Alikuza dini ya nyumbani. Hofu ya Mungu ilienea katika nyumba yake. Alikuwa ni kuhani wa nyumbani kwake. Aliiangalia familia yake kama amana takatifu. Nyumba yake ilikuwa na zaidi ya roho elfu moja na aliwaelekeza wote, wazazi na watoto, kwa Mfalme Mtakatifu. Hakuruhusu ukandamizaji wowote wa wazazi kwa upande mmoja au kutokutii kwa watoto kwa upande mwingine. Kwa muunganiko wa mvuto wa upendo na haki, aliitawala nyumba yake katika hofu ya Mungu na Bwana aliushuhudia uaminifu wake.

Yeye “atawaamuru... nyumba yake.” Kusingekuwapo na uzembe wa dhambi wa kuzuia mwelekeo mbaya wa watoto wake, hakuna upendeleo dhaifu, usio wa hekima na wa kudekeza, hakuna kusalimishwa kwa imani yake kuhusu wajibu kwa madai ya kile kinachodhaniwa kuwa ni mapenzi. Ibrahimu si tu kwamba angetoa maelekezo sahihi, bali pia angedumisha mamlaka ya sheria za haki na za kweli.

Ni wachache sana kiasi gani katika siku zetu wale wanaoufuata mfano huu. Kwa upande wa wazazi walio wengi kuna hisia ya upofu na ubinafsi, ambayo inadhihirishwa kwa kuwaachia watoto wao pamoja na busara yao changa na uchu wao mkali usiozoeshwa kutii amri, utawala wa mapenzi yao wenyewe. Huu ni ukatili mbaya kabisa kwa vijana na kosa kubwa kwa ulimwengu. Uendekezaji wa wazazi husababisha machafuko katika familia na katika jamii. Hutia nguvu ndani ya vijana tamaa ya kufuata mwelekeo, badala ya kuyatii masharti ya Mungu.

Wazazi na watoto wote ni mali ya Mungu ili wapate kutawaliwa na Yeye. Kwa muunganiko wa mapenzi na mamlaka, Ibrahimu aliitawala nyumba yake. Neno la Mungu limetupatia kanuni kwa ajili ya kuwa mwongozo wetu. Kanuni hizi zinatengeneza kiwango ambacho hatuwezi kukikwepa ikiwa tungetaka kuishika njia ya Bwana. Mapenzi ya Mungu ni lazima yawe ni ya maana kuu kabisa. Swali tunalopaswa kujiuliza si: Wengine wamefanya nini? Ndugu zangu watafikiri nini? Au Watasema nini juu yangu ikiwa nitafuata njia hii? Bali, Mungu amesema nini? Hakuna mzazi wala mtoto anayeweza kufanikiwa kweli kweli katika njia yoyote isipokuwa katika njia ya Bwana.